


佛地經論

第二

二百二十
聲二

48961



佛日增輝
懺修輪常轉
山城州天安寺法金剛院置



佛地經論卷第二

親光等菩薩造

唐三藏法師

玄奘譯



聲

經曰是薄伽梵最清淨覺不二現行趣無相
法住於佛住逮得一切佛平等性到無障處
不可轉法所行無礙其所成立不可思議遊
於三世平等法性其身流布一切世界於一
切法智無疑滯於一切行成就大覺於諸法
智無有疑惑凡所現身不可分別一切菩薩
正所求智得佛無二住勝彼岸不相間雜如
來解脫妙智究竟證無中邊佛地平等極於
法界盡虛空性窮未來際
論曰次顯諸佛異餘大師故說世尊功德殊



勝又爲其餘生淨信故顯示世尊功德圓滿
應知此中二十一種殊勝功德顯薄伽梵最
清淨覺謂佛世尊普於一切有爲無爲所應
覺境正開覺故又於一切所應覺境淨妙圓
滿正開覺故又於一切如所有性盡所有性
正開覺故名薄伽梵最清淨覺不二現行者
顯示世尊一向無障殊勝功德謂凡夫二乘
現行二障世尊無故以諸凡夫現行生死起
諸雜染住著生死聲聞獨覺現行涅槃一向
棄背利樂他事住著涅槃世尊無彼現行二
障是故說名不二現行趣無相法者顯示世
尊調化方便殊勝功德謂無相法即是涅槃
佛善了知三乘有情隨彼堪能調化方便如
實爲說令彼趣證無相法故住於佛住者顯

佛善了知三乘有情隨彼堪能調化方便如
實爲說令彼趣證無相法故住於佛住者顯
示世尊觀所調化殊勝功德謂住大悲晝夜
六時觀世間故逮得一切佛平等性者顯示
世尊得一切佛相似事業殊勝功德謂證諸
佛相似事業平等性故到無障處者顯示世

尊永斷所治殊勝功德謂已證得解脫一切
煩惱所知二障智故及已永斷一切障故不
可轉法者顯示世尊降伏外道殊勝功德謂
佛正法一切外道不能退轉降伏彼已顯正
道故所行無礙者顯示世尊降伏魔怨殊勝
功德謂所行者即色等境此所行境擾亂心

故障礙善故說名魔怨諸佛世尊心善安定
極悅意境亦不能亂所有功德極善成滿一
切惡境不能爲礙以能摧伏一切境界一切
所行不能拘礙是故說名所行無礙其所成
立不可思議者顯示世尊安立法教殊勝功
德謂佛安立一切法教超過一切尋思境故
遊於三世平等法性者顯示世尊記別三世
殊勝功德謂如現在記別過去未來世事皆
無礙故其身流布一切世界者顯示世尊現
從觀史天宮來下殊勝功德謂現化身普於
一切世界洲渚同時流下入母胎故於一切
法智無疑滯者顯示世尊斷一切疑殊勝功

德謂於諸法已得能除一切疑惑決定智故
於一切行成就大覺者顯示世尊於一切乘
所化有情能隨所應示現自身殊勝功德謂
徧了知一切有情性行差別如其所應現自
身故於諸法智無有疑惑者顯示世尊妙善
了達一切法智能隨所應恒正教誨殊勝功
德謂於諸法懷疑惑者無有堪能隨應教誨
唯佛世尊證見諸法智善決定能隨所應無
倒教誨無休廢故凡所現身不可分別者顯
示世尊能正攝受無染自身殊勝功德謂諸
佛身非是虛妄分別所起無煩惱業生雜染
故以如來身非是雜染分別起故不可分別

一切菩薩正所求智者顯示世尊成就佛種
不斷方便殊勝功德謂諸菩薩為令佛種無
斷絕故勤修加行非聲聞等是故佛智唯諸
菩薩正所應求得佛無二任勝彼岸者顯示
世尊自性身分殊勝功德謂佛法身無差別
相故名無二佛無二任即是法身真如為體
無差別相於中一切二相分別皆不現行緣
彼勝定常住其中故名為任即無二任名勝
彼岸佛已窮到故名為得不相間雜如來解
脫如智究竟者顯示世尊受用身分殊勝功
德謂受用身不相間雜一切如來受用身體
各各別故如來妙智能令一切衆生解脫故

名如來解脫妙智佛於此智已得究竟如是
即說如來妙智不相間雜於淨佛土現受用
身亦不相雜大集會中現種種身與諸菩薩
受用法樂亦不相雜如來於此智所現身亦
到究竟證無中邊佛地平等者顯示世尊證
真如相殊勝功德謂真如相無有中邊遠離
一切有爲無爲中邊相故遠離方處中邊相
故如是真如即是佛地平等法性證此佛地
平等性故徧知一切爲無爲等於中不染極
於法界者顯示世尊證得果相殊勝功德謂
得窮極清淨法界如是法界是修道果次後
二種殊勝功德顯示世尊功德無盡盡虛空

性窮未來際者顯示世尊自利利他二德無盡殊勝功德謂如虛空經成壞劫性常無盡如來一切真實功德亦復如是常無斷盡知未來際無有盡期利他功德亦復如是窮未來際常作一切有情利益安樂事故

復次此中惣別顯示世尊殊勝功德初句是惣由所餘句開顯其義如是乃名善說法要由二十一殊勝功德是故說名最清淨覺不二現行者顯示世尊於所知境一向無障智轉功德謂聲聞等於諸境界智有障礙極遠時方無邊差別諸佛法中無智轉故如來不亦一切時方無邊差別諸佛法中一切種智

無障礙轉於諸法相無知不知二種現行是
故說名不二現行由此故名最清淨覺餘句
皆應如是配屬趣無法相者顯示世尊能入
無二殊勝功德謂自能入永離一切分別自
相解脫一切煩惱纏垢離有無相清淨真如
亦令他入住於佛住者顯示世尊任運佛事
不休息任殊勝功德謂無功用利有情事無
有間斷安住聖天及梵住故逮得一切佛平
等性者顯示世尊於法身中所依意樂作業
無別殊勝功德謂一切佛真如淨智一切利
益安樂意樂受用變化二利他事無差別故
到無障處者顯示世尊已修一切障法對治

殊勝功德謂已修習一切煩惱及所知障對
治聖道已到解脫一切障處所依所趣故名
為處不可轉法者顯示世尊不為一切外道
所伏殊勝功德謂教證法皆不為他所退轉
故所行無礙者顯示世尊雖生世間世法不
礙殊勝功德謂生世間利等八法不能礙故
其所成立不可思議者顯示世尊安立正法
殊勝功德謂十二分殊勝教法出過一切尋
思所行非諸愚夫所能測度宣說一切自相
共相故名安立遊於三世平等法性者顯示
世尊能正記別殊勝功德謂於三世流轉句
義曾現當生展轉記別無顛倒故記別去來

皆如現在分明無倒故名平等其身流布一切世界者顯示世尊同時普於一切世界示現受用及變化身殊勝功德謂於一切無邊世界隨所化宜現琉璃等妙色身故於一切法智無疑滯者顯示世尊斷一切疑殊勝功德謂自決定乃能令他生決定故於一切行成就大覺者顯示世尊入種種行殊勝功德謂隨所化有情所宜現同類身令彼入故於諸法智無有疑惑者顯示世尊了達當來法生妙智殊勝功德謂於出過聲聞等境微細善種如瓦石中細金種子如是等境無顛倒相皆徧知故凡所現身不可分別者顯示世

尊隨其勝解如應示現殊勝功德謂佛世尊
雖無分別如末尼珠由諸如來增上力故亦
由自身勝解力故見如來身如金色等然諸
如來無有分別無異分別廣說如經或同彼
類不可分別一切菩薩正所求智者顯示世
尊無量所依所化有情調伏方便殊勝功德
謂由無量菩薩所依一切有情調伏方便此
由如來增上力故得聞正法思修次第獲得
妙智異類菩薩攝受付囑展轉相續無間而
轉得佛無二任勝彼岸者顯示世尊平等法
身波羅蜜多最極成滿殊勝功德謂於佛地
無二法身一切施等波羅蜜多平等圓滿不

相間雜如來解脫妙智究竟者顯示世尊隨
其勝解示現無雜清淨佛土殊勝功德謂觀
有情勝解差別示現種種不相間雜金等佛
土證無中邊佛地平等者顯示世尊三身方
處無有分限殊勝功德謂證平等無初中後
諸佛三身於其佛地佛淨土中無有一切方

處分限極於法界者顯示世尊窮生死際常
現起作一切有情利益安樂殊勝功德謂此
法界善清淨故窮生死際常起等流契經等
法為當來世所化有情如應如時恒現起作
利益安樂盡虛空性窮未來際者顯示世尊
無盡究竟殊勝功德謂如虛空常無窮盡諸

佛法界所起功德亦復如是無窮盡故如未
來際無有盡期利樂一切有情加行無休息
故諸佛功德爲性是常無盡究竟爲性無常
相續不斷無盡究竟不可定說以佛法身清
淨法界理性功德性是常故受用變化二身
功德雖性無常無斷盡故無盡究竟一切如
來本發弘願爲有情故求大菩提若諸有情
盡得滅度亦時諸佛有爲功德何不斷滅諸
有情界無有一切盡滅度時故佛功德無有
斷滅所以者何由法亦故無始時來一切有
情有五種姓一聲聞種性二獨覺種性三如
來種性四不定種性五無有出世功德種性

如餘經論廣說其相分別建立前四種性雖無時限然有畢竟得滅度期諸佛慈悲巧方便故第五種性無有出世功德因故畢竟無有得滅度期諸佛但可為彼方便示現神通說離惡趣生善趣法彼雖依教勤修善因得生人趣乃至非想非非想處必還退下墮諸惡趣諸佛方便復為現通說法教化彼復修善得生善趣後還退墮受諸苦惱諸佛方便復更拔濟如是展轉窮未來際不能令其畢竟滅度雖餘經中宣說一切有情之類皆有佛性皆當作佛然就真如法身佛性或就少分一切有情方便而說為今不定種性有情

決定速趣無上正等菩提果故由此道理諸佛利樂有情功德無有斷盡此利他德依自利德乃得無斷是故如來有爲功德從因生故雖念念滅而無斷盡由佛功德無盡究竟是故成就最清淨覺其餘諸句皆應如是一配屬何故先說諸佛淨土後說世尊如是功德爲顯如是諸佛功德依淨土故爲顯世尊依淨佛土具如是德說此經故次顯世尊眷屬圓滿謂大聲聞及大菩薩餘經中說調順調順而爲眷屬解脫解脫而爲眷屬是名如來眷屬圓滿此說無量大聲聞衆無量菩薩摩訶薩俱一切調順皆佛子等

皆任大乘遊大乘等如其次第聲聞菩薩眷
屬圓滿何故此中先說聲聞後說菩薩爲於
大乘生疑惑者除彼疑故爲引不定種性菩
薩生定信故爲己清淨諸大聲聞捨於自身
尊貴慢故謂於衆前大聲聞衆近對世尊親
受化故又諸聲聞常隨佛故形同佛故內眷
屬故又令菩薩於聲聞衆生恭敬故如契經
言菩薩不應於聲聞衆不生恭敬由是讚歎
聲聞功德亦令其餘於聲聞衆生淨信故於
此會中亦有餘衆結集法者略說二衆以其
勝故如經後言世間天人阿素洛等一切大
衆聞佛所說皆大歡喜信受奉行前說淨土

最極自在淨識爲相云何會中有聲聞等而
不相違有何相違諸聲聞等同菩薩見故成
相違若聲聞等亦如是見可作是說諸聲聞
等雖預此會障見淨妙業所礙故猶如生盲
不見如是淨妙境界不可難言旣不能見不
應在衆以雖不見如是淨妙而見穢土化身
說故雖同一會自業力故所見各異如見真
金謂爲火等如於一處四種衆生各別見等
或復如來神力加被令暫得見聞說妙法此
是如來不思議力不可難以根地度等化亦
無過爲欲莊嚴說法會故或佛化作或諸菩
薩之所化作

經曰與無量大聲聞衆俱一切調順皆是佛
子心善解脫慧善解脫戒善清淨趣求法樂
多聞聞持其聞積集善思所思善說所說善
作所作捷慧速慧利慧出慧勝波擇慧大慧
廣慧及無等慧慧寶成就具足三明逮得第
一現法樂住大淨福田威儀寂靜大忍柔和
成就無減已善奉行如來聖教
論曰無量大聲聞衆者其數甚多難可筭計
故名無量聞佛言音而入聖道故名聲聞並
出家僧故名爲衆一切皆是最極利根波羅
蜜多種性聲聞故名爲大有義皆任無學果
位故名爲大如實義者皆是不定種性聲聞

得小果已趣大菩提故名爲大或衆數多故名爲大如今大衆一切調順者有義有學離見所斷一百一十二種分別麁重煩惱不懽悵故猶如良馬名爲調順有義無學離見修斷一百二十八種煩惱不剛強故猶如真金名爲調順如實義者皆是迴向菩提種性一切堪能發趣大果隨佛意轉如聰慧象故名調順由佛教力彼聖道生故名佛子如說皆從世尊口生正法生故有義皆是趣大聲聞能紹佛種令不斷絕故名佛子心善解脫者離三界貪故如說離貪心得解脫慧善解脫者已離一切染污無明故如說離於無明慧

得解脫戒善清淨者如契經說具足六支名
戒善淨謂任淨尸羅善自防守別解律儀軌
則所行皆悉具足於微細罪見大怖畏受學
學處或復皆得無漏戒故名善清淨如實義
者任無學位迴向大來自分戒淨修菩薩戒
故名善淨趣求法樂者求正法時欲趣大樂
謂佛菩提不求餘事或求法時爲令他樂無
求過意離惡威儀如實義者此大聲聞專求
法樂不求名聞利養恭敬無量經典初中後
分皆能聽受故名多聞隨所聞義皆能憶持
令不忘失故名聞持數習文義令其堅住是
故說名其聞積集世間愚夫惡思所思惡說

所說惡作所作出世聖者超過彼法與彼相
違是故說名善思所思善說所說善作所作
三業清淨隨智慧行於佛所說法毗奈耶速
入其義故名捷慧即於此中多入其義故名
速慧能多行者說名速故入微細義故名利
慧得能出離生死妙慧故名出慧此慧能為
涅槃了因是故說名勝決擇慧勝決擇故名
勝決擇即是涅槃此慧能為彼了因故依彼
立名問答決擇無窮盡故名為大慧深廣圓
滿善通達故名為廣慧有本復說甚深妙慧
謂他不能窮其底故於輒根等諸聲聞眾此
慧勝故名無等慧此慧能招最上義故名為

慧寶是諸聲聞具此慧寶是故說名慧寶成
就具足三明者謂得無學三種明故云何名
爲無學三明一宿住隨念智證通明二死生
智證通明三漏盡智證通明無學利根所得
三通除不染三際愚故說有三明有義明
者以惠爲性慧能除闇故說爲明有義無癡
善根爲性翻無明故逮得第一現法樂住者
證得不退勝靜慮故大淨福田者永離煩惱
如世良田速能生長廣大果故威儀寂靜者
一切威儀正知住故大忍柔和成就無減者
於苦堪耐易共住故已善奉行如來聖教者
諸有所作已圓滿故如來聖教本爲有情出

生死苦是諸聲聞位登無學皆出生死故善
奉行如來聖教若尔何故復爲說法爲今迴
向大菩提故是諸聲聞皆任無學盡此一報
必入永滅無餘涅槃寂靜安樂與佛無異如
餘論說何故引彼趣大菩提長時受苦變易
位中無諸苦受斯有何過行苦有故是爲大
過雖經此苦今得如來三身功德大喜大樂
故無有過一切大樂不過涅槃彼已證得復
何所少更求菩提涅槃雖有寂滅安樂而無
受樂三菩提樂斷受樂等無量功德何用行
苦有爲樂耶有爲無漏猶如涅槃是無漏故
非行苦攝又若成佛能化無量所化有情出

生死故已成佛者無此能耶無始時來衆生
法亦能化所化種性相屬不相屬者即無化
能是故如來種種方便化諸有情今得佛果
化彼所化若亦聲聞或除七生或除一生或
除上界處處一生餘一切生得非擇滅或一
切生皆非擇滅云何更經三無數劫修菩提
因而得佛耶雖諸煩惱所潤分段得非擇滅
而由願力受變易生三無數劫修菩提因無
有過失非擇滅者衆緣不具於此時中畢竟
不生非永不生彼雖長時住在生死由定願
力資感生因令其功能多時生果即此一身
展轉增勝乃至成佛如延壽法更不受生故

論說言問迴向菩提聲聞為住無餘依涅槃
界發趣無上正等菩提為住有餘依涅槃界
耶答唯住有餘依涅槃界中可有此事所以
者何以無餘依涅槃界中遠離一切發趣事
業一切功用皆悉止息問若唯住有餘依涅
槃界中發趣無上正等菩提者云何但由一
生便能證得無上正等菩提所以者何阿羅
漢等尚當無有所餘一生何況當有多生相
續答由彼要當增諸壽行方能成辦世尊多
分依此迴向菩提聲聞密意說言若有善修
四神足已能住一劫或餘一劫者此
中意說過於一劫彼雖如是增益壽行發趣

無上正等菩提而所修行極成遲鈍樂涅槃
故不如初心始業菩薩彼既如是增壽行已
留有根身別作化身同法者前方便示現於
無餘依涅槃界中而般涅槃由此因緣皆作
是念其名尊者於無餘依涅槃界中已般涅
槃彼以所留有根實身即於此界瞻部洲中
隨其所樂遠離而住一切諸天尚不能覩何
況其餘衆生能見彼於涅槃多樂住故於徧
遊行彼彼世界親近供養佛菩薩中及於修
習菩提資糧諸聖道中若放逸時諸佛菩薩
數數覺悟彼覺悟已於所修行能不放逸復
次迴向菩提聲聞或於學位即能棄捨求聲

聞願或無學位方能棄捨由彼根性有差別
故所待衆緣有差別故如是若在無學位中
迴向菩提由定願力數數資昔感現身因令
於長時生果相續漸漸增勝乃至成佛功能
方盡此報雖親有漏因感然由無漏定願資
助名不思議變易生死無漏定願不思議故
若有學位迴向菩提或隨煩惱感生勢力感
彼生已於最後生伏諸煩惱起定願力資後
身因如前道理乃至成佛或迴心已即伏煩
惱起定願力資現身因如前道理乃至成佛
諸用無漏定願資助非煩惱者皆不思議變
易身攝若煩惱力所感異熟分段身攝若說

聲聞是化所作不須如是問答分別
經曰復有無量菩薩摩訶薩從諸佛土俱來
集會皆任大乘法於諸衆生其心平
等離諸分別及不分別種種分別摧諸魔怨
遠離一切聲聞獨覺繫念分別廣大法味喜
樂所持超五怖畏一向趣入不退轉位息諸
衆生一切苦惱所逼迫地而現在前妙生菩
薩而爲上首

論曰所言菩薩摩訶薩者謂諸薩埵求菩提
故此通三乘爲簡取大故須復說摩訶薩言
又緣菩提薩埵爲境故名菩薩具足自利利
他大願求大菩提利有情故又薩埵者是勇

猛義精進勇猛求大菩提故名菩薩此通諸
位今取地上諸大菩薩是故復說摩訶薩言
何故讚說菩薩功德爲捨衆生輕慢心故有
作是言諸聲聞衆久修梵行諸菩薩衆應當
敬礼又今衆生起淨信故菩薩尚有如是功
德何況如來於此讚說菩薩德中顯諸菩薩
有三大事名摩訶薩一者數大以無量故二
者德大謂任大乘遊大乘等三者業大謂息
衆生諸苦惱故利樂有情是菩薩業從諸佛
土俱來集會者謂從十方種種佛土爲聽法
故俱來集會亦應有此索訶世界菩薩來集
而結集者但說他方菩薩來集爲欲對治懈

怠憍慢不來集會求聞法故如是菩薩從彼
方來自求聞法非他所引一切皆具大威神
力尚從他界極遠方來何況其餘而不來集
前聲聞衆不說來集在此方故今說他方俱
來集會故知亦有此方菩薩但略不說就德
大中應知略說九種德大一精進大謂皆住
大乘由精進力安住大乘拔濟有情令離生
死及自發趣無上菩提二因大謂遊大乘法
即十地等以聞思修等漸次而遊三所緣大
謂於諸衆生其心平等即於一切有情得自
他平等以大慈等平等方便故四時大謂離
諸分別及不分別種種分別即於一切時猶

如一念平等而轉劫名分別以於一切劫與
非劫分別斷故以不分別劫與非劫故能長
時修行無厭五無染大謂摧諸魔怨以捨一
切所攝受故能伏魔怨如說菩薩若於一切
所攝受事知不堅實心不貪求即能摧伏一
切魔怨六作意大謂遠離一切聲聞獨覺繫
念分別即是遠分斷除一切五乘作意七任
持大謂廣大法味喜樂所持即用大乘法味
喜樂爲食八清淨大謂超五怖畏即三業清
淨出諸怖畏無犯戒等諸惡趣等怖畏因故
五怖畏者一不活畏二惡名畏三死畏四惡
趣畏五怯衆畏如是五畏證得清淨意樂地

時皆已遠離九證得太謂一向趣入不退轉
位即得一切智記別地時一向不退前七地
中猶有加行功用運轉未得不退無功用道
其餘諸地得無加行功用運轉一向趣入不
退轉地以不退地無功用道一向趣入是故
說名一向趣入不退轉地就業大中息諸衆
生一切苦惱所逼迫地而現在前者謂諸菩
薩能息一切有情內外苦惱逼迫地位現前
此地中有大悲大慈由此二種能息一切內
病等苦外貧等惱之所逼迫此二多作有情
利樂故得此者名爲業大復次皆住大乘者
謂住初地證得遍滿真法界時初得真實大

乘法故名住大乘遊大乘法者謂第二地修行菩薩三聚戒故大乘法即三聚戒於諸衆生其心平等者謂第三地得諸勝定發四無量平等利樂諸有情故離諸分別等者謂第四地得三十七菩提分法離諸分別及不分別種種分別諸分別者即見所斷分別我見初地已離不分別者即修所斷俱生我見此地中離即此二種相應諸法各種種分別行解異故雖前後離盡處惣說如第四定說離苦樂如第三果離五下分有義此地第七識中俱生煩惱一切遠離有義此地第六識中俱生我見一切遠離非第七識以七地來

猶有微細煩惱現行若無第七應無染依應
不似五第七細惑若已遠離五六七地六識
塵感應不現行即違瑜伽解深密說又如二
乘金剛喻定第七識惑與六識中最細煩惱
一時俱斷云何此中先離第七微細煩惱後
離六識塵煩惱耶是故四地得無我智滅意
識中俱生我見未離第七微細煩惱及六識
中餘修斷惑此說伏離非是永滅至第十地
金剛心時方頓斷滅修斷種故摧諸魔怨者
謂第五地觀四聖諦皆平等性摧伏執取生
死涅槃差別魔怨遠離一切聲聞獨覺繫念
分別者謂第六地觀十二支染淨緣起皆平

等性遠離二乘猷患雜染欣樂清淨繫念分
別廣大法味喜樂所持者謂第七地證無相
理於空智中起有勝行受大法樂超五怖畏
者謂第八地一切煩惱不復現行離五怖因
名超五怖五怖畏果初地已離一向趣入不
退轉位者謂第九地決定趣入第十菩薩衆
行圓滿不退轉位息諸衆生等者謂第十地
得大法身起大悲雲雨大法雨息除一切衆
生苦惱所逼迫事

復次如是十句經文十到彼岸十大願等亦
應配釋以初地上一地中普攝一切諸地
行故妙生菩薩而爲上首者謂能發起圓滿

功德諸三摩地名為妙生菩薩得此三摩地
故立妙生号以菩薩名多依法故如慈氏等
於此眾中妙生菩薩最第一故名為上首是
故次下唯告妙生發起所說此經略故唯列
一名所餘眾會但舉其數結集法者意在略
故

佛地經論卷第二

聲

逮逮

音代

正下非

拘

音俱

洲渚

下之

捷

慈葉

懽悵

孔反下

軌則

水上俱

奘

正作

耐

奴代

鈍

徒困

慈催

逼迫

上彼力反

埵

丁果

怯

苦劫

摧

郎

